



MEP ta proyecta Boutique Hotel den area di Bushiri



ORANJESTAD(AAN)-- Segun parlamentario di MEP Sr. Dangui Oduber, 8 aña pasa nos pais a wordo priminti cu e ruinan di Bushiri Hotel lo ta pa pasado manera cu AVP

drenta den gobierno. Awe 8 aña despues e ruinan a bira peor y ta den estado di deterioro y decadencia. E area di Bushiri cu ta un di e prome impresionnan cu un turista

den ki situacion nos pais ta aden. Nos partido tin solucion pa e area aki, e parlamentario a menciona den su comunicado..

El a sigui splica cu e vision cu partido MEP tin ta cu MEP ta focus riba turismo di calidad y no cantidad. "Nos no ta kere den hotelnan grandi cu hopi camber sino nos ta kere den desaroya nos pais cu Boutique Hotels. Pa e area di Bushiri nos partido lo kier mira un desaroyo sostenibel di un Boutique hotel di no mas cu 75 camber di un cadena di 5 strea. E REV PAR di e hotel lo ta entre \$350 y \$600 y lo ta contribui sigur na eleva e producto Aruba y tambe e turista di calidad cu nos kier

bin nos pais. E edificacion lo ta LEED certified.

E condicionan pa bin cu un desaroyo eyan ta cu e hotel lo mester bai traha cu Universidad di Aruba, colegio EPI y tambe EPB. Nos prioridad ta pa esnan cu ta bayendo e scolnan aki y ta den hotel management y horeca ta esnan prome yama pa labora den e hotel aki. Tambe nos kier explora e posibilidadnan pa bin cu Hotel Vakschool bek na e hotel aki. E focus ta pa contratistanan local haya e trabounan.

Como condicion tambe nos lo pone cu esnan cu ta biba riba e pais aki ta esnan promer yama pa bai labora na e hotel aki sin tin mester di importa ningun hende extra. E desempleo na Aruba ta haltisimo y e desempleo bao di nos

hobenan ta mas halto ainda y ta actualmente na 30%. Nos mester percura pa tin desaroyo caminda por garantiza empleo pa nos hendenan, entrada pa gobierno, contribicion na nos GDP y nos economia.

E area cu tin actualmente entre Bushiri y Tamarijn Hotel nos lo presenta un plan caminda lo bai mehora y drecha e beach, bin cun parke di recreacion, canchanan ci beach tennis y beach volley y tambe area pa pick nick. E intencion ta pa conecta e parke linear cu e area aki pa asina nos duna pueblo bek tambe esaki.

Nos vision sigur ta pa nos eleva e calidad di turismo, ofrece pueblo y desaroya areanan di beach pa uso di pueblo y contribui na progreso y bienestar di nos pais", el a termina cune.

